

Årsmelding for 2025 frå fylkestingsgruppa til Vestland SV



Frå venstre: Symphorien Pombe, Marianne Sæhle, Marthe Hammer, Alexander Papas, Hege Lothe og Åsmund Berthelsen.

Sak 3: Årsmelding

Kort om 2025

Det har vore eit spesielt år i fylkestingsgruppa. Tre av fem medlemmer i gruppa var toppkandidatar ved stortingsvalet hausten 2025. Hege Lothe var fyrstekandidat i Sogn og Fjordane valkrins, medan Marthe Hammer og Alexander Papas var fyrste- og andrekandidatar i Hordaland. Marthe Hammer vart vald inn på Stortinget og gjekk ut av gruppa i oktober. Fyrste vara, Symphorien Pombe, vart difor fast medlem i fylkestinget frå oktober 2025. Han gjekk inn i kulturutvalet, eit politikkområde han kjenner godt, sidan han sat i kulturutvalet i heile førre fylkestingsperiode.

Då Marthe Hammer søkte om fritak frå oppgåvene sine i fylkestinget måtte fylkestingsgruppa konstituera seg på nytt. Åsmund Berthelsen hadde ønskje om å halda fram som leiar i hovudutvalet for opplæring og kompetanse. Dermed vart den tredje på fylkestingslista, Marianne Sæhle, vald av gruppa til å ta over vervet som gruppeleiar og medlem i fylkesutvalet.

Å ta over etter Marthe Hammer er ikkje ei enkel oppgåve. Ho har eit tiår bak seg som fylkespolitikar og seks år som gruppeleiar. Ho tek med seg mykje erfaring, kunnskap og ferdigheiter til Stortinget. Det er svært bra for partiet og for rikspolitikken, men det merkast òg at ho har gått ut av fylkestingsgruppa. Me vil nytta høvet til å takka Marthe Hammer for godt samarbeid gjennom fleire år, politisk teft og klokskap, og for ein utretteleg innsats for SV i fylkespolitikken. Marianne Sæhle har teke fatt på oppgåva som ny gruppeleiar med godt mot og vil finna sin eigen veg. For gruppa sin del har dette òg gjeve høve til å diskutera valperioden så langt og korleis me vil arbeida resten av perioden.

Politisk arbeid

I denne delen gjer fylkestingsgruppa greia for det politiske arbeidet som har gått føre seg i dei fire hovudutvala, fylkesutvalet og fylkestinget.

Hovudutval for opplæring og kompetanse

SV har både utvalsleiar og eitt medlem i hovudutvalet. Åsmund Berthelsen er leiar og kan i praksis driva politisk arbeid på fulltid. Marianne Sæhle var utvalsmedlem fram til og med fylkestinget i oktober 2025. Då kom Hege Lothe inn i utvalet.

Hovudutvalet har hatt 13 møte, av dei tre ekstramøte. I samband med møte har me vitja Knarvik vgs og Austrheim vgs i Nordhordland i fyrste halvår, og Fitjar vgs, Bømlo vgs og Stord vgs i andre halvår. Me har eit fast opplegg ved slike besøk, med innleiing frå områdeleiar. Deretter får me ei orientering frå rektor om utviklingsplan og særskilde satsingar, med påfølgjande dialog med leining, tillitsvalde og elevråd, før me får omvising på skulen. Gjennom desse besøka får utvalet godt innsyn i kva skulen arbeider med og korleis. Ei gledeleg endring er at elevane er meir med i møta med skulane og er meir aktive enn tidlegare. Det er svært positivt.

Sak 3: Årsmelding

I oktober var hovudutvalet for fyrste gong på studietur utanfor fylkesgrensene. Då gjekk turen til Drammen. Her hadde me møte med fylkespolitikarar og administrasjon frå Buskerud fylkeskommune. Me fekk ei orientering om korleis den private vidaregåande skulen, Akademiet, organiserer skuledagen og tenkinga bak dette. Dei tenkjer alternativt med timeplanoppsettet, og lærarane er i større grad rettleiarar enn undervisarar.

Me vitja den fylkeskommunale Åssiden vgs, der elevane med kring 3 eller lågare i snitt kjem inn, og mange har store utfordringar knytt til narkotika og vald. Det var svært interessant å få innsyn i korleis dei arbeider medvite og systematisk for å møte utfordringane. Me fekk òg orientering om PPT- og OT-tenesta, som arbeider under felles leing i Buskerud. Dette er noko SV meiner Vestland kan læra av.

Buskerud fylkeskommune har eit interessant opplegg med alternative læringsarenaer gjennom Ung Invest. Dette liknar på produksjonsskulane i Vestland, men med ein viktig skilnad: Her kan elevane sjølvle søkja. Dei møter eit praktisk opplegg med verkstader og undervisning, og læringsarbeidet følgjer læreplanmåla. Dei arbeider styrkebasert, slik Åsane vgs i Vestland har starta med. Buskerud har fem slike avdelingar. Me meiner at Vestland kan nytta denne måten i arbeidet med å utvikla produksjonsskulane.

Fleirtalspartia har fleirtal i opplæringsutvalet, og ein del møtetid vert brukt på å samordna og drøfta ulike standpunkt mellom partia. Det er eit godt samarbeid og ein god tone i fraksjonen, sjølv om det må lagast kompromiss for å få til semje frå sak til sak. Det er fylkesutvalet som gjev uttale på vegner av fylkeskommunen. Me meiner det er eit problemet er at forslag ofte kjem på høyring så seint at opplæringsutvalet ikkje får høve til å uttala seg før fylkesutvalet har møte.

Me har ikkje fått heilt sving på å få til faste fellesmøte i vår eigen fraksjon. Det må me få på plass i komande arbeidsår.

Åsmund Berthelsen leiar både fellesfraksjonen og utvalsmøta. Han markerer SV på ein god måte. Han er ein samlande og god leiar, set seg grundig inn i sakene som kjem til utvalet, og er tydeleg på at det skal vera grundige og kunnskapsbaserte prosessar.

Dei vidaregåande skulane i Vestland

Åsmund Berthelsen har vitja alle dei 41–42 vidaregåande skulane som Vestland fylke eig. Han opplever at møta der han møter skulane og kan diskutera meir uformelt over bordet, er dei mest nyttige. I desse møta med leing, tillitsvalde og elevar kjem det fram viktig informasjon og vurderingar. Han får kjenna på korleis det heile ser ut og vert opplevd «på golvet». Dei siste skulane han vitja i 2025 var Fyllingsdalen, Langhaugen, Os gymnas, Sandsli, Austevoll og Kvinnherad, i tillegg til møte med Voss gymnas og Voss vidaregåande skule.

Sak 3: Årsmelding

Åsmund har vore med på fleire utdelingar av fagbrev og sveinebrev som opplæringskontora arrangerer. Dette er ei viktig markering av yrkesfaga. Han har òg hatt samtalar med opplæringskontor om utfordringane dei står i, og korleis dei arbeider med å følgja opp lærlingane.

Ved årsskiftet var det 41 offentlege vidaregåande skular i Vestland, etter at Høyanger vgs vart ei avdeling under Førde vgs i 2025.

Os gymnas vert frå 1.8.2026 slått saman med Os vgs, administrativt og etter kvart fysisk. SV fremja forslag om å kalla den nye skulen Ulven, etter eit stadnamn i nærleiken. I fylkestinget fekk forslaget berre SV sine røyster. Begge skulane ønskte eit anna namn enn Os vgs, men det vart likevel resultatet.

Med grunnlag i eit punkt i vedtaket om heilskapleg tilbudsstruktur i fylkestinget utarbeidde fylkesdirektøren forslag til ytterlegare administrative samanslåingar av Fitjar og Stord, samt Sogndal og Årdal. Samanslåing av Voss gymnas og Voss vgs vart òg vurdert, men ikkje lagt fram som forslag. Åsmund Berthelsen brukte den formelle makta si til å ikkje setja saka på sakslista, då føresetnaden i fylkestingsvedtaket var at det først skulle gjennomførast ei evaluering av dei vedtekne samanslåingane før ein vurderte fleire. Ei slik evaluering kan fyrst skje etter at Os gymnas og Os vgs er samanslått 1. august 2026. Å ikkje setja saka på sakslista var avklara med fylkesordføraren, som heller ikkje la saka fram for fylkestinget.

Ut frå det me ser no, er det vanskeleg å sjå føre seg ei administrativ samanslåing utan at det òg skjer ei fysisk samanslåing. Det bør vera mogleg å henta ut eventuelle innsparingar på andre måtar.

Nettskulen i Vestland

Nettskulen er eit supplement til, og skal utfylla, fagtilbodet ved dei vidaregåande skulane og i vaksenopplæringa. Han vart oppretta som eit tiltak for fleksibel opplæring og auka fullføring i 2022. Opplæringa skjer i digitale klasserom med nettbasert læring for både unge og vaksne. Skulen er organisert meir desentralisert, og dei vidaregåande skulane leverer opplæring i fleire fag. Nettskulen skal vera eit supplement og fylla ut der skulane ikkje har tilbod i dei faga elevane ønskjer.

Vaksenopplæring

Om ein er over 19 år og ikkje har fullført vidaregåande opplæring tidlegare, har ein rett til å gå vidare i vanleg vidaregåande skule fram til det året ein fyller 24 år, eller ta vaksenopplæring. Vaksenopplæringa er no modulbasert og ikkje alltid lett å kombinera med klassar eller program i vanleg vidaregåande skule. Gjennom vaksenopplæringa kan vaksne ta fagbrev innan fleire fagområde. Skulane samarbeider med verksemdar innan fagområda og gjer avtalar om ulike læreplassar.

Det er tilbod om vaksenopplæring ved om lag halvparten av skulane i Vestland. Opplæringsutvalet har lite med denne delen av verksemda å gjera, korkje når det gjeld utlysing eller inntak, men utvalet vert orientert.

Sak 3: Årsmelding

Smedlinja

Opplæringsutvalet ser på smedlinja som eit viktig tilbod. I 2025 fekk me vedteke at Odda vgs kan ta inn elevar på smedlinja direkte etter at søknadsfristen går ut 1. mars. Smedlinja konkurrerer med eit privat tilbod ved Hjerleid handverksskule i Innlandet, som har hatt tidlegare inntak enn Vestland. No vonar hovudutvalet og SV at det nye inntaksopplegget gjer at Odda vgs langt tidlegare kan sikra seg elevane som søker seg dit.

Private vidaregåande skular

I Vestland er det 14 private vidaregåande skular. Dei fleste ligg nær Bergen sentrum og har studieførebuande tilbod. Fylkeskommunen eig ikkje desse skulane, men har folkevalde observatørar i styra. Talet på elevplassar i dei private skulane ligg ein stad mellom 1500 og 2000, noko som utgjer litt under 10 prosent. Elevplassar i private tilbod fører til trekk i ramma til fylkeskommunen.

Dei fleste private skulane følgjer eigne opplegg og har andre fristar enn fylkeskommunen med inntak. Slik vil me ikkje ha det. Det vert arbeidd for at dei private skulane skal følgja same inntaksopplegg som fylkeskommunen. I dag søker fleire både private og offentlege tilbod, og det tek lang tid før nokre elevar avklarar kva dei vel. Dette skaper uvisse for dei som står på venteliste til fylkeskommunale tilbod.

Opplæringsutvalet, og seinare fylkesutvalet, handsama i 2025 to søknader om å oppretta eller utvida tilbod ved to skular. Danielsen Intensivgymnas i Bergen søkte om å få oppretta tilbod i naturbruk/akvakultur, medan Framnes kristne vidaregåande skule i Kvam søkte om å utvida med fleire elevplassar innan idrett og studiespesialisering.

I samarbeidsplattforma for partia som har fleirtal i fylkestinget, står det at ein er positiv til «friskular som byggjer på livssyn, alternativ pedagogikk eller driv på særskilde vilkår». Eit fleirtal i opplæringsutvalet rådde likevel frå søknadene frå Danielsen og Framnes. Grunngevinga var at tilboda ville konkurrera med offentlege tilbod, og lokalt i Kvam særleg gå ut over Kvam vgs. I fylkesutvalet røysta Venstre, KrF og ein representant frå Sp for søknaden frå Framnes kristne vgs, og sikra dermed fleirtal. Utdanningsdirektoratet følgde innstillinga frå fylkesutvalet, avslo søknaden frå Danielsen og innvilga begge søknadene frå Framnes.

Tilboda, inntak og dimensjonering

Det er hovudutvalet som har fullmakt og ansvar for å lysa ut tilboda ved dei vidaregåande skulane i fylkeskommunen, justera tilbodet og gjennomføra inntaket. Føresetnaden er at dette skjer innanfor den økonomiske ramma fylkestinget fastset kvart år. Tilboda med søknadsfrist 1. februar og 1. mars vert vedtekne i slutten av november. Etter at søknadsfristane har gått ut, vert det gjennomført fleire prognoseinntak baserte på søkjartala. Dette dannar grunnlaget for å justera tilboda, leggja til og ta bort tilbod.

Sak 3: Årsmelding

For skuleåret 2025/26 vart det lyst ut om lag 990 klassar med til saman 20 275 plassar i vg1, vg2 og vg3. For skuleåret 2026/27 er talet noko redusert av økonomiske omsyn. I samband med justeringane vert talet på elevplassar og klassar tilpassa ramma, og fylkesdirektøren får fullmakt til å oppretta eller leggja ned klassar der det til slutt er svært få søkjarar.

I 2025 oppstod ein spesiell situasjon då det etter søknadsfristen kom fleire hundre ekstra søkjarar som hadde rett til å fullføra vidaregåande opplæring. Desse vart ikkje fanga opp før melding om inntak skulle sendast ut i byrjinga av juli. Dermed måtte talet på klassar aukast, men fylkesdirektøren hadde ikkje fullmakt til å auka meir enn eit par klassar. Klassar med låg oppfylling vart sette på vent, og det vart ikkje teke inn elevar.

Hovudutvalet måtte halda ekstramøte og vedtok å oppretta 18 nye klassar, finansierte gjennom midlar utvalet disponerer, fellesfond og skulefond. Utvalet var kritisk til at inntak til nokre klassar vart sette på pause, og understreka at det er viktig å gjennomføra prøveinntak før ein legg ned klassar med låg oppfylling.

Dei nye klassane vert vidareførte komande skuleår, òg då med fondsmidlar. Samstundes har fylkestinget vedteke å redusera rammene til skulane med 14 millionar kroner. Dette kan føra til at opplæringsutvalet må vera strengare med å oppretta klassar med få elevar. Fylkeskommunen har eit vilkår om 85 prosent oppfylling i kvar klasse, men dette er vanskeleg å halda når ein samstundes ønskjer å halda oppe dei mindre skulane. Det er òg naudsynt med ein del mindre klassar for å kunna gje alle eit tilbod.

I saka om heilskapleg tilbodsstruktur, som vart handsama i fylkestinget hausten 2024, slo eit samla fylkesting fast at ein ønskjer å oppretthalda dei mindre skulane. Denne planen ligg til grunn for utlysing og justering av tilbod. Samstundes er det alltid søkjartala til dei ulike programtilboda som avgjer om ei klasse vert oppretta eller ikkje.

Det er ein gledeleg auke i talet på søkjarar til yrkesfaga, og Vestland er eitt av fylka med flest elevar på yrkesfag. I Bergensområdet er det likevel framleis underkapasitet på yrkesfagplassar. Administrasjonen gjorde ein stor jobb med å skaffa både lærarar og lokale til dei nye klassane som vart oppretta, og inntaket enda med at alle fekk eit tilbod. Dette meiner SV var svært viktig å få til.

Hovudutvalet har òg hatt oppe sak om meir permanente løysingar for å sikra nok yrkesfagplassar i Bergen. Det vert arbeidd med planar for å utvida kapasiteten ved Slåtthaug, og for å utvida Årstad vgs i samband med bygging for fagskulen. Det vert òg arbeidd med planar for å utvida kapasiteten ved Bergen maritime og Laksevåg vgs. I 2026 vil det truleg verta vedteke rom- og funksjonsprogram for desse investeringane, som kan løysa utfordringane med for få yrkesfagplassar i Bergensområdet.

Ei mindre endring i oppflyttingsretten frå vg1 til vg2 på studieførebuande program skapte utfordringar for nokre elevar. Endringa innebar at det ikkje lenger var automatikk i å få plass på vg2; det måtte vera ledige plassar. Ved Knarvik vgs vart det vedteke å leggja ned ei klasse i studiespesialisering grunna få søkjarar. Som følge av

Sak 3: Årsmelding

endringa fekk ikkje alle søkjarane plass ved skulen, og nokre vart viste til andre skular. Dette er uheldig, men bakgrunnen er økonomi og ei meir restriktiv haldning til små klassar. Høgre og Framstegspartiet ønskte å fjerna retten til oppflytting heilt, noko som ville fått store konsekvensar. SV meiner dette er ei sak opplæringsutvalet bør sjå på att, då ordninga skaper unødvendig uvisse og meir stress for elevane.

Fullføra og inkludera

Hovudmålet for vidaregåande opplæring i Vestland, slik det er formulert i temaplanen, er at flest mogleg skal fullføra vidaregåande utdanning gjennom å inkludera alle og ha merksemd på motivasjon, meistring, læring og trivsel. Hovudutvalet får rapport om kvalitetsutvikling og resultat to gonger i året, med oversyn over fullføring, karakterar og andre kvalitetskriterium. Fylkeskommunen får statlege midlar til fullføring, og det er sett av ekstra midlar i opplæringsbudsjettet for dei neste tre åra.

Midlane vert fordelte mellom skulane, og noko vert nytta til å sikra tilbod som er avgjerande for at ungdommar skal få fyrstevalet sitt. Dette er viktig for fullføring. Statlege midlar vert òg nytta til å delfinansiera produksjonsskulane, som har vist seg å vera ein suksess når det gjeld å få fleire til å fullføra utdanning eller gå ut i arbeid. Midlar vert vidare nytta til meir opplæring og til å styrkja tilbodet for minoritetsspråklege elevar. Fullføringsmidlane bidreg til at fleire kan gjennomføra vidaregåande opplæring og få grunnlag for å delta i arbeidslivet.

Eit anna prosjekt er «Inkludering i Vest», som vert drive av avdelinga for plan og næring i fylkeskommunen. Prosjektet er retta direkte mot personar som står utanfor arbeidslivet og ønskjer jobb. Det er òg fokus på at flest mogleg ungdommar skal få sommarjobb, der opplæring spelar ei rolle.

Fullføringsprosenten har halde seg relativt stabil over tid. Førebels ser han ut til å vera noko lågare enn i skuleåret 2024/25, men dette er før elevar som har teke opp att fag, har fått endelege resultat. Det er truleg at nivået vert om lag det same som året før, rundt 85 prosent. Samstundes er målet å koma høgare. Vestland ligg over landsgjennomsnittet, og det er framgang i fullføringa blant elevar på yrkesfag. SV meiner me må vurdere fleire alternative læringsarenaer enn produksjonsskulane, og arbeida meir styrkebasert – med utgangspunkt i kva elevane kan og ønskjer, framfor å fokusera på problem og diagnoser.

Mobbetala varierer. Dei siste rapportane syner ein nedgang, men skilnadene mellom skulane er store, frå nær null til over 10 prosent. I fylkestinget i desember var mobbing eige tema, med innleiing frå elev- og lærlingombodet. Mange deltok i ordsiftet, og det vart understreka at det må arbeidast meir medvite og planmessig på alle nivå. Skulane må analysere eigne tal grundig for å forstå årsakene til både låge og høge mobbetal.

Stort fråvær uroar, då elevar kan risikera å ikkje få vurdering i fag og i verste fall falla ut av skulen. Fråværgrensa slik ho er i dag, ser ikkje ut til å bidra til lågare fråvær. Opplæringsutvalet har vedteke eit mål om å redusere fråværet til fem prosent. Vestland fylkeskommune har tolka regelverket noko annleis enn departementet, ved at elevar med kronisk sjukdom som til dømes treng å oppsøka helsesjukepleiar, kan

Sak 3: Årsmelding

dokumentera fråvæer frå fyrste time utan å venta til fråværet har passert ti prosent. Dette har òg Innlandet gjort, men KS og andre aktørar er kritiske til denne praksisen, som har vorte omtala som «sivil ulydnad».

Karakterresultata for skuleåret ligg på eit snitt litt over 4, om lag på same nivå som året før. For SV er det særleg gledeleg å sjå at tala syner at Vestland lukkast betre enn mange andre fylke med elevar som kjem inn i vidaregåande opplæring med låge grunnskulepoeng.

Nokre etterord om opplæring

Me er overtydde om at me har berre gode skular i Vestland. Erfaringane Åsmund Berthelsen har gjort seg gjennom møta ved alle skulane, syner at det vert arbeidd systematisk for å utvikla skulane vidare.

Me har tru på opplegget avdelingsdirektøren har sett i gang under vignetten «Framtidas skule», som starta med ei samling for alle leiarane. Det vil både koma og må koma endringar i korleis ein driv skule i den uvisse tida me lever i. Dei vidaregåande skulane er viktigare enn nokon gong. Møta med leiarar, tillitsvalde og elevar syner eit godt samarbeid mellom aktørane i skulen. Me merkar oss òg at elevane er meir aktive, ikkje berre i å arrangera aktivitetar, men òg i å påverka læringsarbeidet.

Politisk er det ulike meiningar om kva tilbod som skal lysast ut, og kor det skal byggjast opp eller takast ned. Det er òg noko ulikt syn på kor store ressursar opplæringa skal ha, men skilnadene er ikkje dramatiske. Usemja kan verta større når ein i 2026 skal drøfta ressursfordeling og finansiering, til dømes om ein skal ha klassefinansiering, elevfinansiering eller ei ordning midt imellom. Hovudutvalet er orientert om det komande arbeidet, og det er lagt opp til ein grundig gjennomgang.

Me ønskjer oss endå større engasjement frå lokallag og medlemmer i saker som gjeld vidaregåande opplæring. Lokalt trur me SV-laga kan tena på å ha tettare kontakt med skulane. Dette kan òg styrkja kontakten mellom ungdom og SV, noko som er særskild viktig for oss.

Hovudutval for samferdsle og mobilitet

Då mangeårig samferdslepolitikar for SV, Marthe Hammer, vart vald inn på Stortinget hausten førre år, gjekk Alexander Papas inn som nytt medlem i hovudutval for samferdsle og mobilitet. Skiftet innebar at noko erfaring og historikk forsvann, samstundes som nytt engasjement og arbeidslyst kom til.

Gjennom hausten har Alexander arbeidd målretta med å setja seg grundig inn i sakene og tematikken som utvalet handsamar. Det har vore tett dialog med lokallag og lokale folkevalde i aktuelle saker, i tillegg til godt samarbeid med Naturvernforbundet og andre organisasjonar der SV har samanfallande interesser. I forkant av kvart utvalsmøte er det møte i SV-fraksjonen der me går gjennom sakene til utvalet og eventuelt fordeler ansvar for vidare oppfølging fram til sjølve møtet.

Sak 3: Årsmelding

Kollektivtrafikken

I 2025 har SV vore tydelege på at me treng meir pengar til kollektivtrafikken slik at me kan styrkja tilbodet og stimulera til auka bruk. Samstundes må det erkjennast at det har blitt dyrare å drifta kollektivtrafikk dei siste åra, og at kostnadsveksten har vore så stor at ho ikkje let seg dekkja inn utan nokre takstaukar. Dette heng saman med ei svært sterk kostnadsutvikling, særleg innan ferjedrift, men òg med ein strammare kommune- og fylkesøkonomi. SV meiner likevel at målet må vera å halda kollektivtransporten rimeleg, men først og fremst sørgja for fleire avgangar og eit føreseieleg tilbod. Eit godt kollektivtilbod handlar både om pris, frekvens og pålitelegheit, og krev langsiktig finansiering og sterkare statleg medverknad for å unngå at kostnadsaukar blir skyvde over på dei reisande.

Ungdomskortet har vore oppe til diskusjon. Dette fordi at ordninga med ungdomskort erstattar retten til gratis skuleskyss i Bergen. Ein landa nok ein gong på å ikkje gjera endringar, og SV argumenterte for dette fordi det at han erstattar skuleskyss gjev oss ein lovpålagt incentiv til å halda prisen på han låg (minst 50 % av månadskort for vaksen). Ordninga har fungert godt i mange år og sikra ungdom rimeleg kollektivtransport, ikkje berre til/frå skulen, men også resten av døgnet. Dette er ei årleg sak. SV ser også dei prinsipielle innvendingane om at skuleskyss skal vera gratis, og vil ta del i diskusjonane når saka kjem opp att i løpet av 2026.

I fylkestinget i oktober vedtok eit fleirtal ei styrt avvikling av trolleybussen i Bergen, mot SV sine røyster. SV meinte saka var for dårleg utgreidd, og at saksgrunnlaget difor var mangelfullt. SV tapte saka i fylkestinget. Samstundes må det erkjennast at handsaminga kom i ein periode der fylkestingsgruppa ikkje klarte å fanga ho opp, mellom anna i kjølvatnet av stortingsvalet i september. Dette bidrog til at saka fekk mindre politisk merksemd frå oss enn ho burde hatt, og at det ikkje blei arbeid tilstrekkeleg for å snu fleirtalet i forkant av vedtaket.

Byvekstavtalen

Byvekstavtalen for Bergensområdet er eit sentralt verkemiddel for å nå nullvekstmålet i personbiltrafikken. Samstundes viser byutgreiinga for 2025 og utviklinga i trafikkdata at trafikkveksten i Bergensområdet framleis er for høg, og at utviklinga går i feil retning. Dette set både klima og framkome under press, og viser at transportsystemet i og rundt Bergen er i ferd med å kollapsa. Byvekstavtalen skal snart reforhandlast mellom partane i Miljøløftet – kommunane i Bergensområdet, fylkeskommunen og staten.

For SV er det avgjerande å setja i verk meir forpliktande tiltak for å redusera biltrafikken, og det har me også teke opp og fremja i fleire saker som handlar om trafikken i Bergensområdet. SV har vore tydelege at me treng kraftige verkemiddel som bompengar og restriktive parkeringstiltak, samstundes som motorvegprosjekt som legg til rette for auka biltrafikk må stansast. I staden må det prioriterast kollektivfelt på innfartsårane til Bergen. Kollektivtransport er eit heilt sentralt verkemiddel i omstillinga. Eit godt kollektivtilbod med høg frekvens og rimelege prisar er avgjerande for at fleire skal velja kollektivtransport framfor privatbil. Bybanen til Åsane er det viktigaste enkeltprosjektet for å auka kapasiteten i kollektivsystemet i Bergensområdet.

Sak 3: Årsmelding

Bybanen

Som følgje av byrådsleiaren i Bergen sitt løftebrot, og det såkalla bybanekompromisset som fylkesdirektøren og byrådsleiaren stelte i stand saman med fylkesordføraren i 2024, er bybanen til Åsane sendt ut på endå ei ørkenvandring. Dette kompromissforslaget kom i si tid utan at SV eller resten av koalisjonen i fylkestinget på førehand var kjende med det. Den manglande politiske forankringa gjorde saka krevjande, og skapte ny uvisse om framdrifta i eit prosjekt som allereie var hardt pressa. Etter omfattande diskusjonar i partiet, bystyret og fylkestinget valde SV saman med koalisjonen likevel å gå med på å gjennomføra ei ny utgreiing. Dette skjedde sjølv om me har lite tru på den alternative traseen, og fordi SV sitt overordna prinsipp har vore og framleis er at bybanen til Åsane må byggjast. Ved inngangen til 2026 ventar me framleis på denne nye utgreiinga, som truleg vil komma like før eller rett etter sommaren. Fram til då står bybanen til Åsane framleis i stampe.

Fylkesvegane

Det er eit enormt etterslep på fylkesvegane i Vestland. Det viktigaste for SV er derfor vedlikehald og utbetring av fylkesvegane våre. I 2025 investerte fylkeskommunen over 3 milliardar i veg, og det same skal gjerast kvart år dei neste fire åra på små og store vegprosjekt. I Nasjonal transportplan er Hordfast i realiteten lagt vekk, noko som gjev oss håp om meir pengar og prioriteringar til rassikring og gul midtstripe framfor unødvendige og naturraserande motorvegprosjekt. I arbeidet med regional transportplan var SV ein pådrivar for ny tunnel på fylkesveg 587 Grimesvingane som omkøyrings- og avlastingsveg i Bergen heller enn firefeltsmotorveg mellom Arna og Fjøsanger.

I 2025 gav fylkestinget grønt lys til tre større vegprosjekt: Fylkesveg 609 Hestvika-Heilevang, Atløysambandet, og ny bru over Alverstraumen. SV stemte for desse prosjekta. SV har både i hovudutvalet, fylkesutvalet og i fylkestinget vore heilt tydelege på at Vestland fylkeskommune ikkje bør gå inn i lobbyselskapet Bergen2Stavanger. Dette er i realiteten berre Hordfast AS med nytt namn, og representerer vidareføring av eit omstridd prosjekt me har vore konsekvent imot. Dessverre fekk me ikkje fleirtal for dette standpunktet, og fylkestinget vedtok aksjekjøpet i juni.

Ferje og båt

I 2025 har hovudutvalet vedteke tidslinje og førebuingar for nye ferjeandod i Hordaland frå 2030. Innbyggjarar, næringsliv og kommunar er involverte i prosessen med innspel og tilbakemeldingar om sambanda som er viktige for dei. Ei ny løysing som ligg an til å bli implementert er seglande reservefartøy, som kort sagt inneber at samband som grensar til å trenga ei ekstra ferje, vil få ei seglande ferje som også er reservefartøy til eit nærliggjande samband. Administrasjonen meiner det vil gje fleire samband ei ekstra ferje, samstundes som ein har reserveferja klar i drift om noko skulle skje på eit nærliggjande samband. SV har også vore tydelege på at me må drøfta moglege løysingar for sambanda Årsnes-Varaldsøy-Gjermundshamn og Utne-Kinsarvik, før me lyser ut anbodskonkurransen våren 2026.

Nullutsleppsbåtar har vore ei viktig sak for SV i fleire periodar, og me jobbar enno med å få elektrifisert hurtigbåtane i fylket. Den vidare elektrifiseringa av hurtigbåtane

Sak 3: Årsmelding

fekk ein stans i 2024, då fylkestinget stansa anbodskonkurransen for elektrifisering av båtrotene Bergen-Sogn og Bergen-Nordfjord. Hovudårsaka var manglande statleg medfinansiering. Etter ein del forseinking vil nye elbåtar setjast i drift på båtsambanda Bergen-Askøy og Bergen-Nordhordland før sommaren 2026. I 2025 fekk fylkeskommunen dessutan ei løyving frå Miljødirektoratet til å elektrifisera båtrotta Bergen-Austevoll-Sunnhordland. Sjølv om midlane ikkje er tilstrekkelege for dei reelle kostnadane ved å elektrifisera, jobbar administrasjonen no med moglege løysingar i samband med nye anbod for ruta.

Skriftlege spørsmål

- I januar stilte Marthe Hammer spørsmål om stengt Fløyfjelltunnel og omlegging av bussrutene på Askøy.
- I februar stilte Hammer spørsmål om hus som skulle utløyast ved fylkesveg 49 i Odda, og rettar i TT-ordninga.
- I oktober stilte Papas spørsmål om kollektivtilbod i Øvre Sædalen, reiserabatt på enkeltbilletter for vaksne, rettleiar for Skyss i grunnskulen, informasjonskampanjar frå Skyss, undergang på fylkesveg 562 på Askøy, og utbetring av fylkesveg 611 og bankgaranti frå Nordic Mining.
- I november stilte Papas spørsmål om kjøp av areal langs fylkesveg 5246 på Askøy, gebyr og kontrollar i kollektivtrafikken, og igjen om kollektivtilbodet i Øvre Sædalen.

Hovudutval for næring

Fram til fylkestinget i oktober 2025 har **Hege Lothe** vore medlem i hovudutval for næring. Då vart det vart endringar i fylkestingsgruppa, overtok **Marianne Sæhle** plassen i næringsutvalet. Næring er eit velkjent fagfelt for Marianne, sidan ho sat i næringsutvalet heile førre periode. I hovudutvalet har ikkje fleirtalspartia fleirtal. I dei sakene som skal vidare til fylkesutvalet eller fylkesting, er det fleirtal der, medan i dei sakene som berre skal handsamast i hovudutvalet skjer det frå tid til anna at me vert nedstemt. Det vert kalla inn til eige fraksjonsmøte i framkant av utvalsmøta. I desse fraksjonsmøta er det mange som har bidrege, men kanskje spesielt **Steinar Øydvinn** og **Einar Svendsen** har vore trufaste bidragsytarar.

Næringsutvalet fordeler midlar til næringsutvikling. Mange av desse løyvingane formidlar hovudutvalet vidare tildelingar frå Innovasjon Noreg og SIVA. Desse løyvingane har ulike føremål. Det kan til dømes vera næringshagar, reiselivstiltak, landbruk, forskning og investeringsfond for å nemne nokre stikkord. Fylkeskommunen lyste ut pengar til ny bærekraftig verdiskaping. Då kom det inn mange gode søknadar, og SV tok initiativ til å auke rammene slik at endå fleire av dei beste søknadane kunne få tildeling.

Hovudutvalet har handsama fleire planar for utbygging av vasskraft, ein utbygging med sol og uttalt oss om havvind. I desse sakene er SV opptekne av å sjå sakene utifrå naturvern-perspektiv. Me prøver å balansera omsynet til naturen opp mot ynskje om meir fornybar kraft og dermed også meir utbygging. Når me får slike høyringar, prøver me å få lokale partilag i tale eller ulike typar naturvernmiljø, og sjølvsagt også saman med dei andre partia i koalisjonen, sjølv om me oftast vert raskast samde med MDG og Venstre.

Sak 3: Årsmelding

Hovudutvalet har også arbeida med å få på plass betre ladestruktur for tungtransport. Det er vedteke ein plan og me er i gang med tilskotsordninga. Strategien er å supplere den nasjonale innsatsen og sikre at me får mest mogleg ut av ordningane. Me meiner SV kan vere nøgde så langt, Vestland ligg framfor dei fleste andre fylke. Utvalet handsamar mange planar. Gjennom året har me arbeidd med temaplan for landbruk, temaplan for reiseliv, temaplan for breiband og digitalisering, regional plan for fornybar energi, regional plan for innovasjon og næringsutvikling, samt melding om kystskogbruket. Breibanddekninga i Vestland er nesten i mål, men på grunn av reduksjon i tildelinga over statsbudsjettet har fullføringa blitt sett noko på vent.

Næringsutvalet har ein del saker knytt til landbruksnæringa. I desse sakene har me hatt god kontakt med næringa og spesielt **Mari Austvoll Gjengedal**, leiar i Hordaland bonde- og småbrukarlag som gjev gjennomarbeidde innspel når me ber om det.

Hovudutval for kultur, idrett og inkludering

Det har vore og er framleis ein felles arbeidskultur i hovudutvalet, og dei aller fleste vedtaka er samrøystes. Stundom røyster me ulikt, og då har som oftast samarbeidspartia våre fleirtal. SV har eigne fraksjonsmøte i forkant av møta i hovudutvalet, i tillegg til faste møte med representantane for samarbeidspartia. Alexander Papas var SV sitt medlem i utvalet fram til oktober 2025. Frå oktober 2025 er Symphorien Pombe medlem i utvalet. Dette arbeidet er godt kjend for Symphorien Pombe frå førre periode. Jens Revold blei frå same tid varamedlem til hovudutvalet. Samarbeidspartia er samde om korleis me saman vil arbeide i utvalet, og korleis me vil setje retning for å nå dei måla som er nedfelte i samarbeidsplattforma for perioden 2023-2027. Det blir også halde møte i SV sin eigen fraksjon i forkant av kvart møte i hovudutvalet.

Ny modell for tilskotsforvalting

Hausten 2024 sette eit samrøystes hovudutval i gong ein gjennomgang av tilskotsordningane som fylkeskommunen har innanfor kultur, idrett og inkludering. Målet var å skapa større og meir slagkraftige ordningar som gjer det enklare for å aktørar å søkja seg til, og skapa eit større politisk handlingsrom i ordningane. Utvalet fekk fleire løypemeldingar gjennom 2025, og i oktober 2025 vedtok hovudutvalet den nye tilskotsforvaltinga der ein minska talet på tilskotsordningar frå over 50 til rundt 30. Det viktigaste for SV har vore at tilskotsordningane skal vera forstålege og tilgjengelege for aktørane, og at ein sikrar dei meir smalare interessene og minoritetsgruppene ikkje blir nedprioriterte når nokre av ordningane blir større.

Satsingar og gjennomslag

I forhandlingane om fylkesbudsjettet for 2026, prioriterte SV og samarbeidspartia våre å styrkja kulturbudsjettet. Til liks med 2025-budsjettet, styrkja me driftstilskota slik at me kan inkludera fleire aktørar i ordninga. Me løyvde også meir pengar til tilskotsordninga for regionale kulturbygg slik at me no har løyvd ut ein den fylkeskommunale delen til byggeprosjekta ved Sunnhordland Museum, Gamlekinoen på Voss, og Urnes verdsarvssenter. Samarbeidspartia har vidare peika på at Astruptunet i Sunnfjord og Fyllingsdalen Teater i Bergen skal prioriterast i denne ordninga i dei kommande åra.

Sak 3: Årsmelding

Skriftlege spørsmål

I februar stilte Alexander Papas skriftleg spørsmål om leselyst og litteraturformidling hjå barn og unge i Vestland, og korleis fylkeskommunen kan bidra i dette arbeidet. Spørsmålet og svaret blei brukt som utgangspunkt for interpellasjon og vedtak i fylkestinget i mars om eit fylkeskommunalt leseprosjekt.

Fylkesutvalet

Fylkesutvalet har ei sentral rolle i fylkeskommunen og kan samanliknast med formannskapet i ein kommune. Utvalet førebur saker til handsaming i fylkestinget og har ansvar for saker som ikkje høyrer inn under eit eige hovudutval, til dømes tannhelse. Fylkesutvalet handsamar òg saker som ikkje er ferdighandsama i hovudutvala, og har siste ord i saka eller i kva innstilling som vert sendt vidare til fylkestinget. Det er òg fylkesutvalet som gjev høyringsuttalar på vegner av fylkeskommunen. I tillegg har utvalet eit særleg ansvar for budsjett, økonomi og overordna prioriteringar.

Året starta med ei av dei store kraftsakene: høyringa av meldingar om ny 420 kV kraftleidning Sauda–Blåfalli–Mauranger–Samnanger–Øygarden. Saka skapte massivt engasjement, med folkemøte i Nordhordland, Vaksdal og Kvinneherad, vardebrenning og ei rekkje lesarinnlegg. SV var tydelege både i lokalavisene og gjennom fråsegn i fylkestyret, der me la Naturvernforbundet sitt traseforslag 6.1 til grunn for standpunktet vårt. Dette vart òg fylkesutvalet sitt vedtak i januar 2025.

Fylkesutvalet handsama samstundes høyringsuttale til vilkårsrevisjon og konsesjonssøknad for nye kraftverk knytte til Røldal–Suldal-reguleringa. Her fekk me gode tilbakemeldingar frå mellom anna Ullensvang SV, og var med på å sikra fleirtal for at Vestland fylkeskommune rår frå å gje konsesjon til pumpekraftverk, særleg av omsyn til villreinen.

Fylkesutvalet har òg handsama fleire saker om havvind, mellom anna høyring av strategisk konsekvensutgreiing for Sørvest F, Vestavind B og Vestavind F. SV støtta innstillinga, men meinte det burde vore fleirtal for sterkare krav om ilandføring av kraft i Vestland og Noreg, og for at utbygging på norsk sokkel må nyttast til elektrifisering av installasjonar på norsk side. Dette fekk berre støtte frå Sp og SV.

Derimot fekk SV fleirtal for eit alternativt framlegg i saka om elektrifisering av Tampen, der Vestland fylkeskommune slår fast at Tampen skil seg frå andre prosjekt fordi det allereie er bygd ut havvind. Oljeselskapa må difor stilla med erstatningskraft offshore, gjennom havvind og/eller gasskraft med CCS, før det vert lagt til rette for straumkabel til plattformene.

I tillegg handsama fylkesutvalet innspel til KS sitt Debattheft i januar. SV fremja forslag som var kritiske til KS si rolle i saka om inkluderande arbeidsliv (IA), og peika på at avtalen har fungert godt i over 20 år. Me foreslo òg tydelegare krav om sentrale lønnsoppgjer, meir pengar til kommunane og kronetillegg, men fekk diverre ikkje fleirtal.

Sak 3: Årsmelding

Etter at SV sentralt fekk gjennomslag for ein NOU om tannhelse, kom denne på høyring i fylkesutvalet. Målet til SV er klart: Det skal ikkje kosta meir å gå til tannlegen enn til legen, men vegen dit må vera gjennomførbar. I fylkesutvalet fekk SV fleirtal for at Vestland var positive til fleire av SV sine gjennomslag på Stortinget, som billegare tannhelse for 25–28-åringar, meir regulering av prisar i privat tannhelse, og behovet for å utvida den offentlege tannhelsetenesta – særleg for eldre aldersgrupper.

SV fekk òg gjennomslag i tannhelseplanen for å leggja tannhelse under eit eige hovudutval, og for å opna for fleire betalande pasientar som del av ei styrking og utviding av den offentlege tannhelsetenesta. Fylkesadministrasjonen har gjort ein gjennomgang av klinikkstrukturen innan tannhelse, og la fram forslag til struktur og plan for tannhelsetenesta dei neste åra. Fylkesutvalet vedtok før jul å senda forslaget ut på høyring, før det skal til endeleg politisk handsaming før sommaren 2026.

Elles har fylkesutvalet handsama fleire avgjerande saker, mellom anna ved å sikra fleirtal for bompengeproposisjonen for Arna–Stanghelle, som er ein føresetnad for vidare framdrift.

Skriftlege spørsmål

- Tannklinikken i Ulvik
- Samlokaliserte areal for tannhelsetenesta sitt kompetansesenter i Vestland
- Regnbogefargar på Askøybrua
- Ny kunnskapsrapport om tilstanden i Hardangerfjorden
- Parkering på Kleppstø kai

Fylkestinget

Fire gonger i året er det møte i fylkestinget. SV har ei aktiv fylkestingsgruppe som med spørsmål og interpellasjonar så vel som innlegg og replikkar frå talarstolen. Fylkestinget møtest stort sett i Bergen, men har det siste møte før sommaren utanfor Bergen. Fylkestingsgruppa pleier å leggja opp til å møta lokallaget og lokale folkevalde når me møtest utanfor Bergen. I juni 2025 hadde fylkestinget møte i Florø, og dagen før fekk fylkestingsgruppa vera med omvising hjå lokale aktørar på dagtid og delta på ope møte «Gje SV beskjed» på kvelden i regi av Kinn SV. Det blei eit fint opplegg og mange møtte på ope møte.

Fylkesbudsjettet for 2026

SV har i budsjettarbeidet lagt særleg vekt på å halda kollektivtransporten mest mogleg tilgjengeleg for dei som nyttar han til dagleg. Dei siste åra har kostnadsauken på kollektivdrift vore stor, noko som gjer det vanskeleg å ikkje auka billettprisane. I forhandlingane bidreg SV til å finna løysingar som skjerma prioriterte passasjergrupper, samstundes som ein tok høgd for den økonomiske situasjonen.

Sak 3: Årsmelding

Budsjettvedtaket inneber ein moderat auke i billettprisane, der faste reisande og ungdom blir prioriterte. Prisauken på månadskort blei altså lågare, medan me valde å frysa taksten på ungdomskortet. Det blei samstundes vedteke å setja i gang eit arbeid med å forenkla og modernisera takstsystemet i 2026.

Budsjettet blei vedteke før dei endelege rammene frå statsbudsjettet var på plass. For å sikra at fylkeskommunen får fullt utbytte av dei statlege løyvingane (mellom anna auka løyving til kollektiv), skal fylkesbudsjettet reviderast til fylkestinget i mars 2026. Dette opnar for justeringar som kan styrkja kollektivtilbodet ytterlegare, både når det gjeld pris og tilbod.

I budsjettet for 2026 prioriterte SV kultur i heile fylket. Auka driftstilskot gjer det mogleg å inkludera fleire aktørar, og satsinga på regionale kulturbygg er vidareført gjennom fullfinansiering av fleire større prosjekt i Sunnhordland, på Voss og i Sogn. Det er òg peika ut nye prioriteringar for vidare utvikling av kulturen i fylket, der Astruptunet og Fyllingsdalen Teater står for tur.

Fråsegner, interpellasjonar og spørsmål

Fylkestinget i mars

- Interpellasjon frå Hammer om Bergen-Stavanger og naturrasering. *Ikkje vedteken.*
- Interpellasjon frå Lothe om nei til ammoniakfabrikk på Holmaneset i Bremanger. *Ikkje vedteken.*
- Spørsmål frå Pombe om transparensen i leverandørkjeda av batteri- og køyretøyprodusentar.

Fylkestinget i juni

- Interpellasjon frå Papas om leselystprosjekt. *Vedteken.*
- Interpellasjon frå Lothe om å lovfesta retten til læringsressursar på eige språk. *Samrøystes vedteken.*
- Interpellasjon frå Lothe og Berthelsen om naturvern. *Ikkje vedteken.*
- Spørsmål frå Hammer om Bavallsvegen, om regnbogefargar på Askøybrua, og webkamera på Juvikflaten.
- Fråsegn frå Hammer om krisepakke for den grønne maritime omstillinga. *Vedteken.*

Fylkestinget i oktober

- Interpellasjon frå Lothe om lønnspolitikk i kraftselskap. *Ikkje vedteken.*
- Spørsmål frå Papas om kollektivtilbod for innbyggjarane i Ølen og Utbjoa.

Fylkestinget i desember

- Interpellasjon frå Papas om påverknadsarbeid og folkestyre. *Ikkje vedteken.*
- Interpellasjon (og fråsegn) frå Sæhle om støtte til Sudan. *Ikkje vedteken.*
- Spørsmål frå Sæhle om litteraturbåten Epos.
- Spørsmål frå Berthelsen om fylkesveg 611 Sæla-Engebø

Sak 3: Årsmelding

Organisatorisk

Heile fylkestingsgruppa møtest fysisk til gruppemøte på politikardagen framfor kvart fylkesting. Me har hatt eitt fysisk strategimøte på seinhausten i Bergen. Utover dette skjer gruppemøta digitalt, stort sett i framkant av fylkeskommunale møte.

Fylkestingsgruppa deltok på ei felles samling med dei andre partia i koalisjonen i Flåm i Aurland i november. Hammer, Papas, Sæhle og Lothe var på samling i Oslo saman med dei andre fylkestingsmedlemene i SV i april 2025.

Frikjøp

Marianne Sæhle er i praksis frikjøpt på heiltid, med 85 prosent frikjøp i fylkeskommunen. Ho har 50 prosent frikjøp som medlem i fylkesutvalet og 35 prosent frikjøp som gruppeleiar. I tillegg er Åsmund Berthelsen frikjøpt som leiar i hovudutvalet for opplæring og kompetanse, tilsvarande 70 prosent. Fylkeslaget har dermed to frikjøpte heiltidspolitikarar.

I periodar har det vore aktuelt for fylkestingsgruppa å gjera andre avgrensa frikjøp, til dømes av Alexander Papas i samband med budsjettforhandlingane hausten 2025. Fylkestingsgruppa nyttar òg sekretærstøtte frå dei tilsette i Vestland SV, fylkessekretær Aslak Owren og organisasjonskonsulent Sigrid Sandal.

Fylkestingsgruppa i media

Fylkestingsgruppa prøver å vera aktiv og synleg, både i nyhendemedium, radio, TV og i sosiale media. Representantar frå fylkestingsgruppa stiller elles gjerne på demonstrasjonar og arrangement for å synleggjera SV i saker som er viktige for folk.

Uttrekk frå Retriever ligg som vedlegg til årsmeldinga for dei faste representantane i fylkestinggruppa. Det er fem faste representantar, men grunna endringane i gruppa visast her tal for alle som har vore faste representantar i løpet av året.

Mediepublikasjon for dei faste representantane, alle saker

Kandidat	Artikkel	Melding	Innlegg	Radio/TV	Totalt
Marianne Sæhle	17	1	1	0	19
Åsmund Berthelsen	126	3	21	10	160
Alexander Papas**	129	4	61	9	203
Hege Lothe*	140	1	64	3	208
Symphorien Pombe***	7	1	0	0	8
Marthe Hammer****	317	4	118	30	469
Totalt	736	14	265	52	1 067

Mediepublikasjon for dei faste representantane i fylkestingsgruppa, i tidsrommet 01.01.25-31.12.25. Publikasjonane er sortert etter format.

Sak 3: Årsmelding

** Alexander Papas var andrekandidat i stortingsvalet i Hordaland.
** Hege Lothe var fyrstekandidat i stortingsvalet i Sogn og Fjordane.
*** Symphorien Pombe vart fast representant i fylkestinget i oktober.
**** Marthe Hammer var fyrstekandidat i stortingsvalet i Hordaland. Ho vart vald inn, og gjekk difor ut av fylkestingsgruppa i oktober. Tala hennar er frå nyttår til og med 8. september. Talet for resten av året er 780, og ein årstotal på 1 249 .*

SV i folkevalde organ

Fylkestinget

Marthe Hammer, gruppeleiar (til oktober 2025)
Marianne Sæhle, gruppeleiar (frå oktober 2025)
Åsmund Berthelsen, medlem
Alexander Papas, medlem
Hege Lothe, medlem
Symphorien Pombe, medlem (frå oktober 2025)

Anna Skaar, 1. varamedlem
Asle Olsen, 2. varamedlem
Tone Mjelde, 3. varamedlem
Gaute Losnegård, 4. varamedlem
Mari Svartveit Hansen, 5. varamedlem
Rafael Cobo Garrido, 6. varamedlem
Hlin-Såga Brosvik Kyrkjeøy, 7. varamedlem

Fylkesutvalet og fylkesvalstyret

Marianne Sæhle (frå oktober 2025)
Marthe Hammer (til oktober 2025)
Alexander Papas, 1. varamedlem
Åsmund Berthelsen, 2. varamedlem
Symphorien Pombe, 3. varamedlem

Hege Lothe, 3. varamedlem (til Venstre si liste)

Valnemnda

Marianne Sæhle, (frå oktober 2025)
Marthe Hammer, (til oktober 2025)
Åsmund Berthelsen, 1. varamedlem
Hege Lothe, 2. varamedlem
Symphorien Pombe, 3. varamedlem

Hovudutval for samferdsle og mobilitet

Alexander Papas (frå oktober 2025)
Marthe Hammer (til oktober 2025)
Asle Olsen, 1. varamedlem
Gaute Losnegård, 2. varamedlem
Tea Volle, 3. varamedlem

Sak 3: Årsmelding

Hovudutval for kultur, idrett og inkludering

Symphorien Pombe (frå oktober 2025)

Alexander Papas (til oktober 2025)

Anne Skaar, 1. varamedlem

Tone Mjelde, 2. varamedlem

Jens Revold, 3. varamedlem

Hovudutval for opplæring og kompetanse

Åsmund Berthelsen, leiar i hovudutvalet

Hege Lothe (frå oktober 2025)

Marianne Sæhle (til oktober 2025)

Rafael Cobo Garrido, 1. varamedlem

Hlin-Såga Brosvik Kyrkjebø, 2. varamedlem

Åge Rosnes, 3. varamedlem

Torunn Olsnes, 4. varamedlem

Hovudutval for næring

Marianne Sæhle (frå oktober 2025)

Hege Lothe (til oktober 2025)

Mari Svartveit Hansen, 1. varamedlem

Steinar Øydvinn, 2. varamedlem

Viviann Midtbø, 3. varamedlem

SV i styrer, råd og utval i Vestland 2023-2027

Baroniet i Rosendal/Den Weis-Rosenkroneske Stiftelse

Styret: Silje Nordtveit Olsen, medlem

Stiftelsen Bymuseet i Bergen

Styret: Marianne Sæhle, varamedlem

Stiftinga Kystkultur no!

Styret: Symphorien Pombe, medlem

Stiftelsen Museum Vest

Styret: Rafael Cobo Garrido, medlem

KS landsting

Utsending: Marthe Hammer (*frå desember 2025, Marianne Sæhle*)

Vara: Åsmund Berthelsen, Marianne Sæhle (*frå desember 2025, Hege Lothe*),

Alexander Papas

Stiftinga Nynorsk Kultursentrum

Rådet: Hege Lothe, rådsordfører

Stiftinga Røde Kors United World College

Rådet: Åsmund Berthelsen (leiar i hovudutval for opplæring og kompetanse)

Sak 3: Årsmelding

Landsamanslutninga av nynorskkommunar (LNK)

Varautsending til landstinget: Alexander Papas

Distriktsprogramrådet for Vestland

Rådsmedlem: Alexander Papas

Forum Nye Bergensbanen

Arbeidsutvalet: Marthe Hammer, varamedlem

Frå og med desember 2025: Alexander Papas

Samarbeidande kraftfylke

Utsending til årsmøte: Marthe Hammer

Frå og med desember 2025: Hege Lothe

Vestland vassregion:

Varamedlem: Hege Lothe

Bybanen AS

Styret: Marianne Sæhle, medlem

Interesseselskapet Fjordvegen Rv 13 IKS

Styret: Marthe Hammer, medlem

Frå og med desember 2025: Alexander Papas

Teater Vestland AS

Styret: Hanne Bergljot Oftedal, medlem

NDLA: Representantskapet

Medlem: Åsmund Berthelsen (leiar i hovudutval for opplæring og kompetanse)

VIGO IKS: Representantskapet

Medlem: Åsmund Berthelsen (leiar i hovudutval for opplæring og kompetanse)

Bergen Kjøtt AS

Styret: Marthe Hammer, medlem

Frå og med desember 2025: Marianne Sæhle

Skrivekunstakademiet

Styret: Hege Lothe, varamedlem

Grieghallen IKS: Representantskapet

Medlem: Marthe Hammer

Frå og med desember 2025: Marianne Sæhle

Verdsarvrådet for verdsarvstaden Bryggen

Medlem: Marthe Hammer

Frå og med desember 2025: Marianne Sæhle

Yrkesopplæringsnemnda

Varamedlem: Hege Lothe

Ålfotbreen verneområdestyre

Styret: Åsmund Berthelsen, medlem

Sak 3: Årsmelding

Jostedalsbreen nasjonalparkstyre

Styret: Hege Lothe, medlem

Fagskulen i Vestland

Styret: Hege Lothe, varamedlem

Trafikktryggingsutvalet

Medlem: Marthe Hammer

Vara: Asle Olsen, Gaute Losnegård, Augusta Moen Opsahl

Frå og med desember 2025 har me felles liste til dette utvalet saman med Arbeidarpartiet.

Arbeidarpartiet har fast medlem då det måtte vera ei kvinne frå samferdsleutvalet, medan Alexander Papas er 1. vara og Asle Olsen er 3. vara.

Administrasjonsutvalet

Medlem: Marianne Sæhle

Vara: Åsmund Berthelsen, Marthe Hammer (Hege Lothe, frå desember 2025), Alexander Papas

Rådet for menneske med nedsett funksjonsevne

Rådet: Mari Svartveit Hansen, varamedlem

Klagenemnda

Nestleiar: Torunn Olsnes

Varamedlemmer: Gaute Losnegard, Tone Mjelde, Asle Olsen

Fylkeseldrerådet

Rådet: Kjellbjørg Lunde, medlem

Vald inn for LOP: Åge Rosnes, vara

Regionalt bustadforum for Bergensområdet

Marthe Hammer, leiar

Frå og med desember 2025: Alexander Papas